

Ilmu Dan Sikap Yang Tepat Kunci Keteguhan Kepimpinan Silang Budaya - Rosmah Bernama
6 September, 2012
Daripada Niam Seet Wei

SHANGHAI, 6 Sept (Bernama) -- Isteri Perdana Menteri Datin Seri Rosmah Mansor berkata kunci kepada pembentukan kepimpinan silang budaya yang teguh terletak pada pembangunan sikap, pengetahuan dan kemahiran yang tepat.

"Pengalaman dalam membentuk pasukan global yang melangkaui kerakyatan akan membina dan mempertingkatkan kemahiran penting seperti komunikasi silang budaya, pengurusan konflik dan diplomasi.

"Pengalaman ini akan memberi mereka keyakinan membuat keputusan penting untuk maju dalam kerjaya," katanya dalam ucap tama bertajuk 'Women Leadership In A Cross Cultural Environment' (Kepimpinan Wanita dalam Persekitaran Silang Budaya) pada Forum Kepimpinan Wanita (WIL) China, di sini, Khamis.

Turut hadir Timbalan Menteri Pembangunan Wanita, Keluarga dan Masyarakat Datuk Heng Seai Kie, Duta Malaysia ke China Datuk Iskandar Sarudin dan isteri Menteri Luar, Datin Seri Siti Rubiah Abdul Samad.

Rosmah yang juga penaung Forum WIL Asia menggesa wanita bekerja dengan kerajaan untuk memperjuangkan kuota dan sasaran serta penggubalan dasar yang menyokong kepelbagaian gender untuk jawatan eksekutif kanan.

Beliau berkata kerajaan Malaysia mensasarkan 30 peratus wanita sebagai pembuat keputusan dalam sektor awam dan swasta menjelang 2015.

Beliau juga menggalakan pemimpin wanita untuk bekerja bersama badan bukan kerajaan dan persatuan masyarakat bagi menangani sikap komuniti terhadap kepimpinan wanita.

"Saya tidak berasa ragu bahawa generasi wanita Asia masa hadapan akan memiliki keyakinan, kemahiran, sifat, bakat, kebolehsuaian, pemikiran yang betul serta kekuatan untuk menjadi pemimpin masa depan yang benar-benar berinspirasi," kata Rosmah.

Pengarah Asia Pacific Institute Patty Friedman Marcus berkata Rosmah memahami cabaran yang dihadapi wanita dan bagi memastikan kejayaan dalam perniagaan serta organisasi, wanita mesti berupaya menangani cabaran itu dengan cara yang realistik dan positif.

Eksekutif Lembaga Pengarah Abu Dhabi Businesswomen Council Nashwa Abdullah Al Quabaisi pula berkata ucapan Rosmah memberi inspirasi kepada wanita untuk memimpin pada masa depan.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=692437>